

# Kelonggaran berpolitik bolehkan mahasiswa pengaruhi dasar k'jaan

**KOTA SAMARAHAN:** Perubahan kepada kebaikan, itu yang harus dan mesti difikirkan oleh golongan mahasiswa yang telah diberikan kelonggaran berpolitik dalam mempengaruhi dasar kerajaan.

Timbalan Menteri Sains, Teknologi dan Inovasi Datuk Fadillah Yusof berkata mahasiswa selaku golongan intelektual perlu mampu berfikir dan menganalisis segala dasar yang telah dibentangkan.

“Dengan transformasi politik di mana kelonggaran diberikan di universiti untuk mahasiswa berpolitik, maka mereka boleh mempengaruhi dasar kerajaan.

“Tapi, ia haruslah dalam konteks yang lebih positif dan konstruktif, bukannya mengikut sentimen dan emosi,” katanya pada Program Sembang Mesra Siswa 2013 Peringkat Sarawak yang bertemakan Peranan Mahasiswa IPT Dalam Pembangunan Negara di UNIMAS, di sini semalam.

Sehubungan itu, Fadillah yang juga calon BN dan penyandang Parlimen Petra Jaya berkata sempena Pilihan Raya Umum Ke-13 (PRU13) ini, mahasiswa perlu

memainkan peranan dalam menganalisis manifesto yang dibentangkan oleh BN dan pembangkang dari segi sama ada ia praktikal dan realistik untuk dilaksanakan.

“Kalau dapat dilaksanakan, bagaimana ia (manifesto) dapat memberi manfaat kepada negara... bagaimana ia boleh menggerakkan negara kepada sebuah negara yang lebih baik daripada kedudukan yang ada sekarang.

“Ini peranan mahasiswa sebab mereka masih dalam bidang pembelajaran di mana satu kaedah pembelajaran ialah untuk membuat kajian dan analisis,” katanya.

Justeru, beliau yakin para mahasiswa akan dapat bertukar pandangan dan fikiran untuk memperincikan segala manifesto yang telah dibentangkan dan seterusnya membawa serta memberi kesedaran kepada masyarakat keseluruhannya.

Namun demikian, katanya pandangan yang ditetapkan haruslah diperincikan mengikut sudut pandang intelektual dan hati terbuka dengan melihat kepada fakta, sejarah dan kebolehlaksanaan sesuatu agenda.